

常山貞石志

常山貞石志卷二十四

詔授朝議大夫直隸正定府知府今調廣平府知府前署大興縣從選沈清謀

元十

勝公和尚道行碑銘

碑高八尺六寸廣二尺九寸二十四行行五十八字
正書篆額至正十三年四月八日立今在正定府城

內大
佛寺

妙峯上師麟公和尚遺行碑

元故五明成就妙峯上師勝公和尚道行碑銘

朝請大夫秘書少監荅失蠻撰并書

承直郎僉燕南河北道肅政廉訪司事趙儼篆額

至正十有三年春王三月無礙君口刺實理躬致禮幣

介釋教宗主栖源心公之狀而言於予曰理也不天早失所怙遂淦衣祝髮歸命

佛乘內奉慈訓求師甚切而尤甚擇越時始得先師妙峯勝公而事之師亦雅以師道自任誘掖漸磨循循弗倦破惑開邪指示正法旁及儒術罔不命理究心今理也粗知趨向免於墻面皆先師之賜也不幸中途滅我慧炬罔極之恩無以稱報謀欲樹石以壽師行方今言足以取信者無逾先生惟先生有以命之予固讓弗獲迺按其狀曰師姓史氏名省吉巴法諱福勝世為唐兀部族幼異凡兒稍長沉靜簡默不喜俗事父母知其善根夙植遂俾為僧隸圜夏之奉天寺執弟子禮於大

德輝公服勤盡瘁夙夜匪懈以企至道輝公識為法器
且憫其精進卒授以秘密之傳師既得聞心要不欲滯
跡一方乃振錫遠游徧歷叢林究閱典藏叅請徵詰猶
是心地圓明中外融一聞望藹然為諸方推重道愈尊
而身愈謙韜光晦跡禪觀齋居人罕見其面化緣時盡
風燭靡停以至正十二年十二月十四日奄然坐逝觀
者歡感交集閱世凡三十七年而夏安居者十有八後
七日闍維於鎮府之東法華院得舍利無筭順德之開
元真定之龍興及臺山名藍皆以師嘗 感欲建塔
以奉無量若以師素不違衆因四分其骨則應諸應
諸刹之請一則歸藏園夏示不忘本也無礙君復建祠

於天園閣左仍入楮幣五千緡恒居之而以子錢具燃
燈供

佛之費俾寺僧世世主奉祠事焉予既悉其狀始欽師
道德之充終則嗟無礙君之不可及嘗聞吾儒之言曰
民生於三事之如一父生之恩君臨之義莫大莫厚而
師則兼恩義而有之是以於其生也則無犯無隱歿則
心喪是制尊師之道其重蓋若是粵惟西方之教所以
隆教源□□者抑不殊乎此世道日降人不知本學
未通經已忘所自師徒相視漠然如路人今義幾絕有
志之士恒悲且憤而無礙君迺能自拔於流俗□□
古主治其師之後事慎終追遠者纖悉周盡是則不徒

增輝於宗門其於扶世教明綱常豈無補哉於戲源澄
則流潔表直則景端觀無礙君□□耿介沂而測其
後來則師之由以及人者又□□孝見焉既備載其狀仍
繫之以銘銘曰

慧日西沉慈雲興 徧覆九圍周四瀛 法雨普施資

□靈 利澤萬有福羣生 變滅倏翕杳無形 神功

妙用歸冥冥 遺膏餘潤誰其膺 我崇塔廟存儀刑

幡幢擁護栴檀馨 焰焰相續無盡燈 它山之石

豐而貞 螭首龜趺鏤吾銘 惡池滔滔大茂青 山

無騫摧川方增 吾銘□□言足徵 綿綿終古人永

承

是歲四月 □世日立□

佛日廣照大師任持□□路大龍興寺講 經論沙

門 福巖 志慶

國聖普照通明圓覺大師□定路釋教宗主講 經

論沙門 栖源 智心

右碑銘答失蠻撰并書趙儼篆額答失蠻元史無傳
黃文獻公文集有宣徽使太保定國忠亮公答失蠻
神道碑謂公以延祐四年薨與此無涉元史也先不
花傳第三弟答失蠻累官銀青榮祿大夫又文宗本
紀至順三年十二月庚申遣集賢直學士答失蠻請
眞定玉華宮祀睿宗又顯懿莊聖皇后神御殿未知

卽此人否滋溪文彙太保趙襄穆公神道碑陰記稱
瑁第六子忠敏侯秉政子儼由中臺掾爲南行臺照
磨就遷御史改僉湖北廉訪司事曾有詔選守令擢
秦州尹召人待制翰林兼國史院編修官進拜監察
御史案碑陰記撰於至正庚寅爲至正十年此碑建
於十三年列銜燕南僉事當是由監察御史外遷之
官又書史會要趙儼字子威眞定人官至翰林學士
善古隸案瑁本蔚州蜚狐人遷居中山元中山府隸
眞定路故書史會要以儼爲眞定人也八刺實理爲
太師答剌罕秦王右丞相伯顏之子見至正十四年
王訪撰秦王夫人施長生錢記

秦王夫人施長生錢記

碑高七尺廣三尺三寸五分二十三行行五十二字
正書額失拓至正十四年三月立今在正定府大寺
秦王夫人施長生錢記

從仕郎仁虞都總管府知事會稽王訪撰并書

太中大夫監察御史 番易周伯琦題蓋

故太師答剌罕秦王右丞相既薨其夫人怯烈真氏痛
所天之覆失惻偕老之願違欲相從於九泉願幼孤其
誰與託雖厭離於斯世姑延息而稱未亡膏銘罷施珠
珍廢飾紋繡靡靚疏櫛自奉日月遄邁喪紀易終松楸
睇瞻哀情曷弛遂乃薙除鬢髮著壞色衣為苾芻尼用
昭志節又思所以夢王冥報則須崇善善之所崇宜莫

如

佛事佛之至須廣伽藍爰在汴梁捐鬻奩珥購地卜築鳩工位材剏建大明最勝禪寺殿堂門廡高庠序亞栱拱榱桷金碧輝煌供養所須罔不畢備其於崇善多報可謂盡矣而夫人猶以為未也茲來鎮陽復謂其子八刺實理資善曰我雖能為汝父

秦王建寺于汴而寺之僧豈亦忽然忘吾所建之本意都不與作福田利益事耶第以今居去彼之遠不能常日擊爾吾聳龍興閣寺為此郡諸剎之最而觀音銅像又為天下之勝絕地之所勝僧亦必清是宜徼福無惑願以楮幣五千□□寺僧之議出內者規其息以為汝

父秦王薨愍二忌供佛飯僧超度之貲併與吾母 瀛

國夫人生辰延壽修營之助歲凡三日以為常庶淋吾志資善敬諾即詣寺扣僧之職出內者閱實楮幣諭如約然後歸復母夫人命則相以為喜復懇久而或湮沒也於是購石龕而將書其事刻以示不朽資善公以書抵京師來取文余謂夫婦者人倫之大綱一與之醮終身不渝惟貞烈賢淑者能之噫世之為人婦者不幸其夫之蚤世僅及服除則膏飾婉容油然有改適之想其冒毀衣薙髮誓靡它者乎其或牽連兒女謂能守志彼奩繡之積政欲誇衒於人矧肯售鬻為夫追冥報者乎此皆夫人之罪人也又其甚者覩去其夫如從傳舍穢

惡形聲覩不知愧者則亦何足論也今夫人義足以厚風俗禮足以正人倫行足以勸天下事足以傳後世冰玉莫儼其潔白也日星莫喻其光皎也雖不因施錢之請猶將大書特書以獻諸史氏況其賢子書來之誠乎固不可得而辭也若夫秦王爵位之隆勲業之盛表表赫赫在人耳目于涿于泚

天子詔樹豐碑命詞臣譔次厯書以極褒美恩寵榮異前代無比此不當贅也王默而吉鰥氏名伯顏三月廿五日是為愍忌四月四日是為薨辰 瀛國夫人唐元氏名字羅真唐貞觀賢相之裔適為故丞相埜仙普化之妻二月八日是其始生之朝也秦王之子八刺實理

寔夫人怯烈真氏所出美才質勤學問悅禮樂而敦詩
書幼年入侍上嘉之即命以官初授朝列大夫威武阿
速衛千戶佩金符末幾超授資善大夫擢本衛指揮使
天性至孝以王之薨哀慟幾絕追慕不已遂棄官不仕
亦出家學

佛號無礙若將終其身焉是為記

至正十四年歲甲午三月吉日 佛日廣照大師住

持龍興寺講經論沙門 福巖 志慶 建

右碑王訪撰并書周伯琦題蓋王訪無攷周伯琦字
伯溫元史有傳書史會要伯琦篆師徐鉉張有行筆
結字殊有隸體正字亦善又本傳云至正十二年有

旨令南士皆得居省臺除伯琦兵部侍郎遂與貢師
泰同擢監察御史兩人皆南士之望一時榮之十三
年遷崇文太監兼經筵官丁內艱十四年起復爲江
夏肅政廉訪使案碑立於至正十四年伯琦列銜猶
稱太中大夫監察御史則碑額當是未遷崇文太監
時所書至十四年始行刻石耳訪列銜爲仁虞都總
管府知事武宗本紀至大元年二月癸巳立鷹坊爲
仁虞院秩正一品仁宗本紀至大四年二月丁卯罷
仁虞院復置鷹坊總管府文宗本紀至順元年十月
乙亥改打捕鷹坊總管府爲仁虞都總管府順帝本
紀十五年正月庚辰復設仁虞雲需尚供三總管府

案百官志各總管府皆置知事一員碑立於至正十四年復設仁虞等三總管在十五年然則王訪之爲此官當在至順改立之後矣元史伯顏傳伯顏蔑兒吉解氏以珣戴文宗順帝功官至太師答剌罕秦王丞相後至元三年誅唐其勢伯顏獨相專權自恣帝患之六年二月帝與伯顏姪脫脫等謀因其出田柳林黜爲河南行省左丞相奏乞陛辭不許遂行三月辛未詔徙南恩州陽春縣安置病死龍興路驛舍知據碑謂四月四日其薨辰傳稱死於龍興路驛舍知伯顏之死卽在後至元六年四月又碑謂于涿于汴詔樹豐碑云云文宗本紀至順三年四月命有司爲

伯顏建生祠立紀功碑於涿州仍別建祠立碑於汴
梁是也碑謂伯顏夫人怯烈真氏爲故丞相埜仙普
化之女攷元史有也先不花傳系蒙古怯烈氏累官
上柱國銀青榮祿大夫湖廣等處行中書省左丞相
至大二年卒天○二年贈推忠守正佐運翊戴功臣
太師開府儀同三司上柱國恒陽王謚文貞其氏族
官位多與碑符然則此碑之埜先普化卽元史之也
先不花無疑矣案蒙古七十二種有怯烈歹氏有滅
里吉歹氏色目三十一種有唐兀氏又碑云秦王子
八剌實理夫人怯烈真氏所出元史伯顏傳不載其
子之名威武阿速衛親軍都指揮使司見兵志百官

志有左右阿速親軍都指揮使司至元九年初立阿速拔都達魯花赤置屬官二十三年名爲阿速之軍至大二年改立左右阿速衛親軍都指揮使司各置達魯花赤一員都指揮司三員並正三品右阿速衛有行軍千戶所千戶七員把門千戶二員左阿速衛有圍宿把門千戶所一十三翼千戶二十六員八刺實理之由千戶擢指揮其爲左爲右則不可知耳

濱川漁逸何體仁墓碣銘

碑高五尺五寸五分廣二尺二十四行行五十字正書篆額至正十五年四月五日立今在無極縣

元故濱川漁逸何先生墓碣銘

元故濱川漁逸何先生墓碣銘

奉訓大夫監察御史薛泰撰

高尚處士符思衷書

鎮陽史塾篆額

先生名體仁字德元姓何氏其先澤州人曾祖晉金末
為錦州防禦使

天兵南下珣知力不支率衆詣木華黎國王降王嘉之
署為黑軍元帥收撫郡邑屢有功績無極縣始立投軍
民長官因家焉祖伯川襲父職至元二年遷轉州縣世
襲官調秦城深澤臨邑曲陽四縣尹兩至振能名四子
長源湖廣省百夫長次淵即先生之父也次溟新軍百
夫長次澄四川省承宣口有學行儒者推尊

裕皇在青宮聞其賢徵至闕授江西南昌尹先生就外
傳即穎敏異常兒讀書日記千百餘言隨仕南昌從師
受業篤志于學雖休澣未嘗輟業父丁母艱去官服闋
調新淦尹先生受學於名儒宋梅洞博通經史尤精於
易妙於琴事父卒官於新淦先生甫冠護柩北還晨夕
哀臨孤苦艱辛跋涉山川歸塋先塋盡禮皆遵古制事
母楚夫人竭盡孝敬延祐初舉茂才異等授無極文學
先生固辭邑宰鄉耆詣門敦請至于再三不獲已廼莅
職教授生徒去浮華還本實據經明理略無懈怠學者
感化莫不雍容循雅絃誦之聲溢于庠舍於是葺廟學
殿□□□大成加號碑遂為偉觀先生素有閑居之志

及蟻滿籀晦光跡不以世務嬰心扁其讀書之齋曰空
谷四圍積經籍終日端坐於其中非探賸物理則體察
性情諸生受學於家者得其指歸今皆為名卿賢士夫
者衆先生儀形秀整操履方嚴蘊於中精一貞純發於
外恭謙和□其動止之則自少至老有如一曰平居恂
恂若無可否及其酬酢事變斷以義理有截然不可易
者以其道高行備遠近敬服歲晚自號濱川漁逸日以
觴詠琴曲自娛平生撰著目曰空谷樵音至正十有一
年冬十有二月二十七日以疾卒於正寢享年七十有
九以是月三十日塋于西北先塋之次配皇甫氏張氏
皆先亡再娶劉氏五子長守信性孝友世家學次守直

湖廣省百夫長守敬守訥守朴俱通敏不墜家聲二女
長早世次適趙氏孫慶孫先生葬己四年矣門生李留
可王述古等恐師之盛德無聞于後裔其縣文學武從
善狀來京求文刻石揭墓表用傳不朽嗟夫世之人嗜
進而不知止者榮利累之也一有榮利之累則必求進
忘反厚集貲業用以肥室家遺後人此心一萌庸肯恬
退乎若先生則不然視榮利為外物惟恐累於已暫為
學官淑後進也寂然嘉遯養心志也清名高誼直與秋
霜爭嚴千載之下人將景仰可不為之銘乎銘曰

鳳之翔世隆昌或時藏可謂不祥乎麟之出為奇瑞或
不至可強致乎先生之德祥鳳瑞麟志未伸善其身棲

遲乎衡門吟嘯乎水濱無懷氏之民歟葛天氏之民歟
保其天真神兮孔存與霜風雪月而為鄰猗嗟哲人遺
高風于千春

至正十五年夏四月五日門生李留可 王述古等
立石 恒陽石魯山懷玉刻

右墓碣銘薛泰撰符思衷書史塾篆額李留可王述
古等立石薛泰符思衷等不詳其里籍鎮陽史塾當
是鎮陽忠武王史天澤兄弟之曾孫攷天澤之子姪
輩命名皆從木孫輩從火曾孫輩從土元孫輩從金
蓋取五行相生之義柳貫文集有元故大司農史義
襄公耀墓志銘言耀本天倪孫後嗣天澤長子格又

云耀子一璵孫四鈞銀山長安金山是也據此可決
篆額之史塾卽天澤兄弟之後但不知爲何人子耳
體仁及其曾祖瑄祖伯川元史皆無傳至元九年馮
崧無極縣屬事題名記有何瑄初立縣事伯川亦曾
任本縣軍民長官此志所云祖伯川襲父職至元二
年遷調州縣世襲官是也攷金制分各路府州爲五
等府尹兼領總管者都總管府其非兼總管府事者
謂之諸府諸節鎮則置節度使置防禦使者謂之防
禦州置刺史者謂之刺史州據大金國志金史地理
志並以錦州爲下等節鎮又元史太祖紀木華黎傳
並稱錦州張鯨殺其節度使自立爲臨海王遣使來

降又中州集載馮子翼官同知臨海軍節度使事元
好問所撰馮壁神道碑姚燧山南廉訪副使馮帖神
道碑並同而此碣稱璫金末爲錦州防禦使與史不
合黑軍之名元史兵志不載石天應傳天應與中永
德人木華黎南下天應率衆謁軍門授典中府尹兵
馬都提控俾從南征旌旗色黑人目之曰黑軍又史
天祥傳天祥父懷德迎降木華黎於涿州命懷德就
領其黑軍隸帳下懷德卒乃命天祥領黑軍進克興
中府張致盜據錦從木華黎討平之得其黑軍五百
人又石抹也先傳張致伏誅籍其私養敢死士萬二
千人號黑軍者上於朝又石抹阿辛傳

案石抹阿辛
即石抹也先

二傳複出
詳略不同

子查刺仍以御史大夫領黑軍初其父阿

辛所將軍皆衣黑故曰黑軍歲己卯詔黑軍分屯眞
定固安平陽隰吉岢嵐間馬祖常征行百戶劉君墓
碣銘攷諱義元帥史天倪辟權署黑軍萬戶虞集嶺
北行省郎中蘇公墓志銘娶劉氏黑軍萬戶義之孫
又元史世祖本紀中統三年閏月辛卯勅武衛軍及
黑軍會於京師是黑軍之名元初有之眞定是其分
屯之地世祖初其名未改不知廢於何時兵志略之
可謂疏漏矣伯川子源溟澄三人皆無攷碑稱澄爲
四川省承宣攷元史百官志行中書省有宣使各省
設員有差承宣疑卽四川行省之宣使宋梅洞無攷

無極縣學大成加號碑未見今不知存否濱川漁逸
蓋因無極縣境有滋水環流故體仁取以爲號王圻
續文獻通考經籍攷有空谷樵音無極何體仁著不
著卷數正與碑合

何瑄墓碑

碑高三尺三寸五分廣一尺七寸五分
二行行五字正書無年月今在無極縣

大元故黑軍元帥何公墓

石碑無書碑人名至正十五年薛泰撰何體仁墓碣
銘言曾祖瑄木華黎國王署爲黑軍元帥無極縣始
立授軍長官因家焉此卽其墓碑也此碑與何淵碑
當是體仁所立因無年月可攷類附體仁墓碣後焉

何伯川墓碑

碑高三尺八寸廣一尺九寸二行行七字上題大元
二字兩旁題名各一行行字不等並正書至正十五
年四月五日立
今在無極縣

真定路無極縣儒學教諭武從□書

勅授敦武校尉曲陽縣尹何公之墓

至正十五年夏四月上旬五日曾孫守信等立石

恒陽石魯山刊

右碑武從□書曾孫守信等立石碑與體仁墓碣蓋
同日所立武君名第二字泐案體仁墓碣有縣文學
武從善則所泐者當是善字

何淵墓碑

碑高三尺三寸廣一尺七寸二行行六字上
題大元二字並正書無年月今在無極縣

勅授從仕郎新淦縣尹何公墓

右碑無號年及書碑人名何體仁墓碣稱體仁父名
淵伯川次子始授江西南昌尹後調新淦尹卒於官
此卽其墓石

陝西行省平章董士選墓碑

碑高五尺七寸廣二尺七寸五行行字不等正書
至正十□年四月立今在棗城縣南董村墓上
□子司業楊俊民書

元故榮祿大夫陝西等處行中書省平章政事董公墓
至正十□年四月吉日立

右碑楊俊民書攷棗城董氏仕元至陝西等處行中

書省平章政事者惟忠獻公文炳次子士選此卽其
墓碑無疑士選字舜卿仁宗初除榮祿大夫陝西行
省平章政事至治元年正月二十三日薨年六十九
追封趙國公謚忠宣事蹟具元史本傳及吳澄撰董
忠宣公神道碑此碑立於至正十□年四月年上一
字泐案公子廉使守愬墓碑亦建於是年四月年上
亦泐而尚存末畫微辨之非十三卽係十五與此碑
當是同時所立案彙城縣志謂俊民由山西廉訪僉
事入爲禮部郎中陞國子司業又至正十二年彙城
縣宣聖廟繪塑記俊民所撰列銜僉江南浙西道肅
政廉訪司事十七年并陘增修廟學記署集賢直學

士據此則是碑當是十五年所書

董守慤墓碑

碑高五尺七寸廣二尺四寸五行行字不等正書
至正十□年四月立今在藁城縣南董村墓上

國子□業楊俊民書

大元故中奉大夫澗東海右道肅政廉訪使董公之墓
至正十□年四月吉日立石

右碑楊俊民書吳澄撰董忠宣公士選神道碑謂公
子男十次四守慤元史士選傳載子三人守忠雲南
行省參知政事守慤侍正府判官守思知威州案忠
宣神道碑忠宣子十人次四守慤次五守忠次六守
思碑本應忠宣諸子之請撰於忠宣歿後之二三年倣

其子孫行次不當有誤而本傳次守忠於守慤之上
與碑不同當從碑爲正守慤事蹟他無所攷僅見於
元史順帝本紀云至正十二年七月大司農達識帖
睦邇及江浙行省參知政事樊執敬浙東廉使董守
慤招諭方國珍道園學古錄平章政事張珪墓志銘
稱珪女五人長適朝列大夫太常禮儀院判官董守
慤三爲守慤繼室案橐城董氏自守慤外無官制東
廉使者則此碑是守慤墓石無疑矣

劉靜修先生題淮陰侯廟詩刻

碑高五尺廣二尺四寸詩七行行十九字後記五行
行四十字並正書篆額至正十五年六月十五日立
今在獲鹿縣
土門口廟內

靜隱先生詩

題漢淮陰侯廟二章

飢僅羸馬倦重遊萬將今兵此坐籌滅項豈知秦尚在
奪齊便覺漢無憂英彭一體誰遺類絳灌諸孫自列侯
愛煞鹿泉泉下水亂山百折只東流

許身良犬咲君癡快快難勝已自危智數相推難免死
才名如此豈無疑兩年藩鎮真猶假十載君臣喜又悲
最恨當時蕭相國直教三族到全夷

莒□成公君美自鎮村幙長君能聲

朝廷□守令選擢獲鹿尹下車之日法令一新土門
去縣十里知其有韓侯廟而往拜之觀其前賢□□

心猶未憊也暇日謂愚曰夢吉劉先生廼

中朝第一流人有題井陘淮陰侯廟二詩豈宜獨闕
歟□□工礪石盡為我書之蓋公之是舉適與愚心
有默契焉故樂為之書噫公之懷賢崇儒之意其用
□□□是之勤則於為政愛民之道寧有遺乎至正
十五年歲在乙未夏六月望日晉城李擴謹書 孫

庸篆額 劉守敬鐫

右七律二首李擴書孫庸篆額成君美立石在縣西
十里土門口廟內靜修名因字夢吉保定容城縣人
表所居曰靜修因以為號至元十九年徵授承德郎
右贊善大夫未幾以母疾辭歸二十八年以集賢學

士嘉議大夫徵不起卒贈翰林學士資善大夫護軍
追封容城郡公謚文靖事蹟具元史本傳案今所傳
靜修集三十卷者卽至正中官爲刊行之本題淮陰
侯廟詩二首見丁亥集及獲鹿縣志第一首萬將分
兵此坐籌集作坐此籌奪齊便覺漢無憂縣志作始
覺第二首智數相推難免死縣志作寧免死當從石
本爲正詩後有記卽李擴所撰成君美名益善見至
正丁酉王得義撰重脩鹿泉神應廟碑道園學古錄
有送李擴序謂歸德李擴事吳先生最久先生之書
皆得授而讀之先生嘗使來授古文故於僕尤親近
今年以國子學生中選將命以官云云元史地理志

河南江北行省有歸德府領縣四州四州領八縣無
晉城之名而晉圍路澤州有晉城縣然則此書碑之
李擴非卽一人矣又元史陳思謙傳至順元年監察
御史行部甘肅金州劉海延都其男元元自稱王延
祿非海延都之子告海延都掠其財擴聽之以酷法
抑其父思謙劾擴逆父子之天壞朝廷之法遂抵擴
罪此則又一李擴亦非書碑之人孫庸無攷

中山判官董公墓碑

碑高五尺廣二尺四行行字不等正書至正
十六年三月立今在藁城縣南董村墓上

奉政大夫大都路朔州知州趙興宗書

大元贈忠顯校尉員外郎中山府判官董公墓

至正十六年歲次丙申三月吉日

右碑趙興宗書董公名及興宗並無攷案山東曲阜縣有至正庚寅遠泉寺同樂記并詩刻趙興宗八分書當是此人

董公墓殘碑

殘碑高三尺一寸五分廣二尺七寸五分三行行字不等正書無年月今在棠城縣南董村墓上

上賢直學士太上肅董公墓

上榮祿大夫張璘書

右碑首行第一字殘泐似賢字下爲直學士太四字第二行肅董公墓四字案賢直學士當是集賢直學士元史百官志集賢院有直學士三員從三品第二

行肅字當是董公之謚攷臺城董氏在元謚肅者惟
守簡謚忠肅守仁謚肅誠鎋謚肅獻及董顯肅侯四
人其他皆不見史志碑碣忠肅官至御史中丞顯肅
則不知其官階名字肅誠肅獻歷官亦與此不同其
人蓋無可攷云碑無立石年月書碑者爲張璘列銜
僅存其階爲榮祿大夫璘元史無傳書史會要云張
璘字公弁保定人官至集賢大學士封滕國公早以
才學知名篆書亦淳古可取攷元史百官志集賢大
學士榮祿大夫並從一品據此知榮祿大夫上當是
集賢大學士案張璘當卽張忠武王柔之孫忠武易
州定興人易州元隸保定路故書史會要稱璘爲保

定人也又忠武有子九人元史惟第八子忠毅公瓘
略第九子獻武王瓘範有傳其他諸子見於史者有
國彥國慶瓘正又忠武諸孫名左旁從玉玠瑾瓘爲
忠毅子蔡國公珪爲獻武子是也珪字公瑞璩字公
弁其爲從兄弟無疑但不知璩是何人子耳

董顯肅侯墓碑

石高一尺一寸廣一尺六寸五分三行行三字
篆書無年月今在襄城縣南董村墓上

內云故董顯肅侯公墓

右碑無號年及書碑人姓顯肅侯亦無攷

邵東節先生題淮陰侯廟詩刻

碑高四尺二寸廣二尺五寸七行行十二字末小字
七行行三十一字行書額題康節邵先生詩六字正

書至正十六年六月立今
在獲鹿縣土門口廟內

題漢淮陰侯廟

韓信事劉元不叛蕭何惑漢竟生疑當初若聽蒯通語
高祖功名未可知

韓信恃功前慮寡漢皇負德□權安幽囚必欲擒來斬
固要加諸甚不難

至正丙申六月予因陪鹿泉監縣伯顏公謁淮陰侯
祠於邑西土門鎮卽古井陘口也公且觀宋金暨我
元所立碑序及詩皆佳作也又見同署縣尹成君美
以靜修劉先生詩刻於石公卽慨然曰昔康節邵先
生過矣之廟亦有留題焉何於此而獨闕哉當取其

要者以表侯之志不亦可乎至於侯之功也出沒如神變化千綫又非□□而□□形容其勝德予知監縣公之意甚盛舉也即咨詢邑人郊肅曰誠哉是言也可見石以請俾書堯夫之詩因以目擊而知侯之心矣遂記之太行書院主者高健書

右七絕二首高健書并記伯顏刻石康節先生見朱史道學傳詩載擊壤集伯顏正定府志職官表有路伯顏至正中獲鹿尹未知卽其人否獲鹿縣志太行書院在縣北二十里閭同鄉元高健置健後官河東廉訪使蓋卽此高健

加封廣祐王聖旨碑

碑高四尺二寸廣二尺四寸十二行行二十一字正書元貞元年二月今在井陘縣

上天眷命

皇帝聖旨有功則祀今古之常經無感不通神明之至德齊聖廣祐王禮嚴祀典名著史編歷代褒崇洋洋闡靈之如在生人嘉賴簡簡垂惠以無疆曾司衡嶽之權久重滏陽之鎮靈懿夫人夙稱柔則克配英風玉燭均調順陰功而內助翠帷儼肅祐多福以旁周宜並錫於嘉名用茂揚於休聞於駸渙其大號既遺爾家室之榮享于克誠益贊我山河之固齊聖廣祐王可加封

靈惠齊聖廣祐王靈懿夫人可加封顯祐靈懿夫人主

者施行

元貞元年二月

右碑無書碑人名及立石年月疑與至正十六年李
中撰重修亞嶽碑同時所刻元史世祖本紀至元十
五年正月封磁州神崔府君爲齊聖廣祐王李中重
修亞嶽廟碑云金承安中分祀五岳以南岳在宋境
乃加封亞嶽行南岳事至元十五年歸岳祀於衡山
乃封齊聖廣祐王元貞二年復加封靈惠二字加靈
懿夫人顯祐二字與此刻相符元史成宗本紀不載
加封事文亦元文類不收未知何人所撰

重修亞嶽廟碑

碑高六尺

寸廣二尺九寸三十行行五十八字正

書額失拓至

正十六年十月立今在井經縣

重修亞嶽廟碑

匡山後學李中撰

將仕郎廣平路威州判官致仕任□

下缺

忠翊校尉平江路嘉定州判官王

下缺

天地間為物最鉅者五嶽而已參化育助生成亞乎五岳者其惟

靈惠齊聖廣祐王之盛歟王姓崔氏諱表字則未聞其先出炎帝之後王父烈考著名當時王大業中擢□□第見□□□□德弗仕唐貞觀中徵為長子令尋遷滏陽令未幾拜蒲州刺史繼除河北道採訪使終于位歸□□滏陽□遺命也部人感王異政□□立祠奉之□□□□德□□宋景祐二年封護國顯應公元符二年

進爵昭惠王又以靈懿夫人配享政和三年賜袞冕儀衛亞於岳神宣和七年封□□尉忠衛侯□□尉忠贊侯從祀廟庭金貞元中封顯應昭惠王仍詔立左右屬司承安中分祀五岳以南岳在宋境乃加封亞嶽□行南岳□以□其□□□

皇元混一區宇地踰南海至元十五年歸岳祀于衡山乃封齊聖廣祐王元貞二年復加封靈惠齊聖廣祐王顯祐靈懿□人□之禦□□心□□禍□功德被于生民者不可殫紀有實錄可考故我

國家歲時與五嶽一體致祭焉王之祠宇在在有之井陘古名郡城之東郭舊有行祠肇基於金皇統間繼葺

於

聖朝至元甲午迄今又踰一甲子矣揅棟荆棘間至正乙未

朝廷以前成安簿崔侯克新有清望選尹是邑視事三日謁祠下遂□然有修復□□越明年政通人和□□倡□□縣吏李守誠等董其役揆日經營合于制度斲良材礱美石丹楹藻井畫棟雕簷繡栴錯交疎寮生輝□二廡于東西繪群司于左右□□□臨畿通衢窮結構之壯麗□一方之偉觀也廟既成丐文於余余嘉崔侯治民克仁事神克誠矧余幸居治下義不可□竊聞亞嶽之神司天命之□長察人行之善惡

汝為善則壽於而躬福於而□汝為惡則夭於而躬禍於而家其應之速如影如響吏畏其威忠於

國而惠於人民駭其靈慈於親而弟於兄吁廟在茲土也警懼於人者著明如此敬之戒之其可忽諸以致五穀豐登風雨弗□神之惠也□□□□□享以時人之誠也神人交歡災沴不作永賴陰陽之慶也貞冥深刻文以紀之以旌作廟之功也再拜獻詩歌以祀之俾邑□迎送其神也辭曰

二氣判兮開鴻濛萬物盈滿兮孰大以雄惟亞岳兮奠形奄神秀兮獨鍾參造化兮坎北暢靈德兮沖融自有虞兮望祀羌□□兮□□□

亞嶽兮應王嚴禮秩兮比隆通幽明兮無間扶

皇極兮有功此行祠兮云久□重脩兮崔公峻雕簷兮
翥風架彩棟兮飛虹耀芳葩兮藻井峙禮門兮□□肅
齋戒兮薦享牲肥腍兮酒醴神之來兮於穆駕王輦兮
蒼龍神之歸兮醉止渺雲旆兮無蹤興禍福兮監□如
響應兮影從或爾尊兮自作即□冥兮□躬民知畏兮
起孝吏□□兮勸忠陰相協兮茲土時雨暘兮屢豐俾
爾康兮耆艾降福祉兮攸同頌神休兮刻石配嶽祀兮
無窮

至正十六年歲次丙申十月朔丁未

下

廣平路井陘縣典史

下

廣平路井陘縣

下

進義副尉廣平路井陘縣主簿

下

從仕郎廣平路井陘縣尹兼管諸軍與魯勸事

下

廣平路井陘縣達魯花赤兼管諸軍口魯勸農

下

右碑李中撰書碑題額人名並泐僅存列銜無可攷

證李中亦無攷碑敘府君仕蹟及宋時加封事頗詳

與樓攻媿中興顯應記正合又碑言王姓崔氏諱表

字則未聞是能不惑於俗說又其識見之高者又碑

敘金貞元承安中兩次加封金史不載崔克新見府

志名宦傳

重修鹿泉神應廟碑

碑高五尺五寸廣二尺四寸五分二十六行行三十
六字額題重修鹿泉神應廟碑八字並正書至正十
七年二月立
今在獲鹿縣

重修鹿泉神應廟碑

真定路獲鹿縣前儒學教諭王得義撰

進義副尉大名路清河縣主簿丁士常書

真定路獲鹿縣太行書院山長高健題額

古井陘口兩山屹峙相峙界獲鹿僅一舍中有廟曰胡
神其廟額神容歲月綿邈頽圯坦夷惟址尚在里人歲
時猶祀焉至正乙未夏四月十又七日成君益善承務
來尹是邑蒞政甫兩月時值旱暵成侯廼捐俸金備香
楮躬率士庶誕展誠悃致禱於祠址其侯之誠有感于

神之靈不三日雨大作使枯者榮槁者生山川生潤而
民心大悅是侯之誠感而遂通者然也厥後累禱累應
而侯之誠愈堅於是仰瞻神宇四顧寥廓無依惟唐宋
金故碑可考乃得神之所自出由漢將韓信將破趙兵
歷此道乏軍井信乃遣卒求河於川還報無有信斬之
如是者再復遣胡姓者往視之胡乃曰前二者復命俱
隔荆吾豈蹈覆轍而速禍耶因矯指向有水信跡進見
二白鹿跑地而泉出珠迸鏡開浴樣東逝若蛺蝶赴壑
因得濟信跡由是人神之而廟焉侯閱碑訖思答神貺
遂召廟之故主東胡神里耿青之孫孫義臣元臣至而
諭之曰昔伊祖好義割地荆廟嘉名載石今廟隳址在

神雖有靈廟像不設又何以使人起敬耶尔年方妙克
享祖業寧不復念尔祖乎汝當克承先志義臣元臣乃
徐曰志存有日但家事不果我侯有命敢不是從遂共
剖財鳩工積木厥廟告成繪像儼然翬飛輪煥為之一
新功訖侯謂耿曰唐宋金之碑著感通之效昭紀神功
其來邈焉迨及我

元神之功呪靈異感通乎民者可徵也詎無石刻以垂
於遠代乎於是求予記之辭不已予謂神之靈固不可
掩者當其濟漢師成功業昭赫於千百載之上今成侯
之誠又能感通乎千百載之下可謂靈也已然非神以
不能休成侯之治非成侯則不能彰神之靈神也侯也

誠千載一遇也予樂為之記因銘曰

國家將興 必有禎祥 龜書馬圖 立世綱常 在

天明命 百靈來王 歲泰□□ 干戈斯張 白鹿

跑泉 漢世乃昌 惟神有靈 甘醴騰漿 濟師億

萬 血食□□ 歲當乙未 赤地亢陽 成侯輪誠

谷應雨暘 既饗既格 乃威乃揚 抱犢□□

鹿水湯湯 永興禋祀 休福無疆

大元至正丁酉春二月日立

右碑王得義撰丁士常書高健題額得義士常俱無
攷高健已詳至正丙申邵康節先生詩刻跋元史選
舉志書院設山長一員中原州縣學正山長學錄教

論並受行省及宣慰司割付凡正長學錄教諭或由
集賢院及臺憲等官舉充之論錄歷兩考陞正長正
長一考陞散府上中州教授上中州教授又歷一考
陞路教授後例以下第舉人充正長備榜舉人充論
錄有薦舉者亦參用之

碑陰

十九行行十
七字正書

維大元至正十五年歲次乙未四月丁巳朔越二十一
日丁丑承務司真定路獲鹿縣尹兼管本縣諸軍奧魯
勸農事成益善躬率僚佐鄉耆人等謹以清酌庶羞之
奠致祭于

鹿泉神神位前

嗚呼有感而應應而遂通者神也有儀必行行而及物者誠也歲登乙未時當首夏雨暘□□而二麥將穡秋種未下而赤地熾然川枯□□林木生烟俾民人粹然無托而悽悽於隴畝之上是其天時之失會而人事之所干歟民實無辜何其乘此昭昭也惟

神有□□漢世而濟□萬師會在我

朝寧無靈脫薨澤以惠及其生民乎於□敢

伸薄奠以祈

神休鑒茲在誠敬饗附祀

伏惟

尚饗

右碑陰字多漫漶稱至正十五年歲次乙未四月丁巳朔越二十一日丁丑具官成益善云云卽碑陽所稱成君禱雨之事此卽其祭文也

井陘縣增修廟學記

碑高五尺六寸廣二尺四寸十八行行三十八字正書篆額失拓有陰至正十七年六月二十日立今在井陘縣學

井陘縣增修廟學記

集賢直學士奉政大夫楊俊民撰 陘山後學李中

書

太中大夫大名路濟州知州兼管諸軍奧魯勸農事

知河防事王士元篆額

學校為風化之源尚矣而昧者忽焉古者塾庠序學布列天下以淑人心慮事遠也人性固善不有詩書漸染之功豈能盡必其不為惡乎我

國家崇尚斯文至矣然猶專責守令以學校為六事之一為守令者果能副

上□意力資教養俾家家聞絃誦之音人人有君子之行漸仁摩義盜賊無自而生也當承平之日尚視為文具多事之秋豈肯盡心於斯乎井陘為縣當真定冀寧兩路之交顧遠屬於廣平地瘠民貧供需浩繁亦俾兩路自中人處之專事徵科日不暇給遑恤廟學乎惟縣

尹崔侯則不然其言曰政治之本學校為先瞻仰報德廟貌為重今也殿廡之外它皆無有關狀如是其何以興儒效乎迺割俸倡僚佐首建神門次神厨次幕舍視殿廡之摧壓朽腐易為壯麗自至正丙申五月戊子至八月告成祭器禮服如式畢備予考試河東鄉貢士歸過其邑適值大軍西征侯於近郊闕為廣營秣具徧野前軍甫去後軍又至斗粟束芻悉經尹手動勤倥傯予亦不堪其擾也及入邑中北望孔廟燦然一新噫何其能也蓋聞其父士安君昔為國子助教學者敬服及為典簿修飾厨舍至今稱美淵源既有所自加以進脩精敏宜乎有為而無倦也教諭陳政請書其事于石嗚呼

使邑邑悉能如侯風俗其有不淳乎宇內其有不陋乎
奈何不能皆侯也可歎已侯名克新都人士也監縣
燕只傑大主簿牛安傑典史王輔皆善人也故能合志
如是是年十月庚午記 至正十七年六月廿 日井
陞縣儒學教諭陳政等立石 石匠本縣周思誠 王
思忠 許伯興刊

右碑楊俊民撰李中書王士元篆額俊民列銜集賢
直學士奉政大夫元史順帝本紀至正十六年二月
命集賢直學士楊俊民致祭曲阜孔子廟仍葺其廟
宇碑撰於是年十月列銜正與史合李中即至正十
六年撰重修亞獄廟碑者王士元見忠義傳士元由

磁州改知濟州至正十七年賊陷濟州士元與其子
俱死難家廟帝紀至正十七年不書士元死難事惟
云八月癸丑劉福通陷大名路九月戊戌太不花復
大名路并所屬郡縣計士元死難當是八月事此碑
立於十七年六月其時士元尚未死也崔克新見重
修亞嶽廟碑

碑陰

十五行行字
不等正書

碑陰後記

元撫臨學地肆頃本學有大德二年文□卷可考

創製祭器等物

祭器壹伯件 儒服壹拾叁套帽帶全 心組供床

陸簡 香棹玖箇

創建社學

微水鎮壹所地口分 井陘鎮壹所地口分 下良

壹所地分 李莊壹所地分 裴村壹所

自願起蓋房舍

在城霍昇蓋神廟冬間 箔村張社長蓋幕棚冬間

額設生員

齊長高仕元 齋諭高雲翼 齋舉楊閏 李口道

孫聚 周端 班本 霍俊 韓哲 王庶 趙

恭 賈瀆

以下人名不錄

宣聖廟塑象記

碑高八尺二寸廣三尺三寸二十一行行四十九字
額題宣聖廟塑象紀六字並正書至正十七年八月
立今在正定府學

宣聖廟塑像記

集賢直學士奉政大夫楊俊民撰

資政大夫燕南河北道肅政廉訪使王恪書丹

中奉大夫燕南河北道肅政廉訪使埜達還題額
像設果古之制歟古者有學無廟凡入學必釋菜釋奠
於先聖先師不過設位立主而已廟且不立况像設乎
然則像設非與蓋事有創於後世而不可廢者雖戾乎

古有勸於今得隨時為制之義君子必有取焉昔者夫子既沒魯哀公即宅立廟○漢之世不出闕里魏晉以來漸及京邑由宋迄今天下無不建廟俾在在有所瞻仰人人有所依歸其於風化豈曰小補廟既增廣像設固不得而闕也或議以此之形冒彼之名神果安乎是不然面之寢揚萬無齊同弊曰人形未始不一設位立主固藹質○自非問道精禮之人未免謬爾視之漠焉奉之其何以致誠敬而動觀感乎今也衷以土木表以采繪風度尊嚴冕服彰明學者見之肅然敬惕思其心必曰古人體貌不加多於我而我不逮古人獨何歟由是可以事神可以希賢又何必索形似於千古之上

乎吾真定廟制惟正殿為塑像兩廡兩序圖以繅素至
正十六年清州趙公任重來尹是郡剗繁理□期年政
成□□□監郡普顏公治中燮微公泊普化公判官末
里公泊多里公同謁廟延升殿團望而歎曰大聖生有
異質□祖庭所記固難盡□□以石本司寇之像卑陋
不稱四公十哲亦然當改為之賢儒畫本豈能持久當
易塑像真定河朔名郡願茲闕狀吾等不得辭其□也
監郡以下皆曰茲固平素之志也即日割俸倡率鳩貲
如干市物募工公特選儒生五人考評制度俾末里公
率三吏專督其役首即殿上據圖易故次創百有五像
土木潔粹工徒齊戒各極心思之妙肇自二月告成五

月集賢楊俊民郡之學者代

祀言還聞斯走謁仰瞻夫子藹然道德之光輝退閱諸
賢儼然揖讓之儀容周旋殿廡如游沐浴之間徘徊眷
戀忘其地之非魯也於乎異哉教授高有學正張貢學
錄段文素趨而言曰盛典方成先生適至願文之石以
紀府公之善噫廟學政之急務不知者忽焉承平鮮舉
多事遑恤今公等上給兵需下撫民瘼既各有方城池
高深市門增壯不日而成牧守之職宜若無以加也浸
興化原曠典於百年之下使人驚喜歎服新視易聽何
其賢也非大尹剛毅有為孰能倡于前非諸公協恭莫
逆孰能和于後不有臬司贊勉其上其何以增吾道之

光武紫是數美夫豈偶然執筆欣躍不自知其文之陋也

有元至正十七年歲在丁酉秋八月癸卯朔立石
鹿泉劉守敬刻

右碑楊俊民撰王恪書丹埜速達通題額王恪即安
童王伯勝子見元史伯勝傳其說已詳龍興寺通照
大師碑跋埜速達通元史有也速解兒康里人官至
欽察親軍指揮使大德三年卒有傳又世祖本紀有
四川行省也速帶兒又作也速答兒亦作也速迭兒
又至元七年有都元師也速帶兒撒吉思傳作野速
答爾宰相表至元二十三年有左丞也速解兒傳爾

忽傳作也速答兒又文宗紀有河南萬戶同知樞密院事也速台兒又燕鐵木兒傳作也速答兒卽阿剌罕子也速迭兒也見虞集曹南王世德碑與此碑之埜速達邇皆無涉又順帝本紀至正五年十月辛丑命奉使宣撫巡行天下宣徽僉院王也速迭兒巡山北遼東道又宰相表至正二十二年左丞內有王也速迭兒未審卽此人否又碑有教授高翥案成宗本紀大德七年二月御史臺臣言浙江行省平章阿里左丞高翥安祐等詭名買鹽萬五千引增價轉市於人乞遣臺官案問從之云云與此碑之高翥名偶同耳

開化寺住持端公終身錢記殘石

殘石高一尺七寸五分廣一尺二寸十一行
行十五字正書號年缺今在元氏縣開化寺

開化寺前住持海印圓融大師講經論

沙門端公和尚終身錢記

文不錄

右殘石立石年月及書撰人姓名皆缺因附于末端
公見元統二年昔里改牙撰開化寺重修聖像法堂
記文鄙俚而兼殘缺故不錄

轉大藏經碑記

碑高三尺廣一尺九寸刻記十九行行三十八字第
二十二行兩行係梵書末題名四行行字不等額
題轉大藏經碑記六字並正書年月
勅今在正定府隆興寺轉輪藏殿

拾財施永業地轉大藏經□德記

聞世出壺尊□□□□□□□□□□之天道成□為愍六趣
之妄情悲三□□□□□□□□□□而除四倒談八空而□
□□□□□□□□頓被圓機漸乃三時□實有異巖□□
□強□□□□以類其高汪洋洋洋漠泐□□□□□□□□
親囑令王臣以護持薩埵□□□□□□□□□□□□□□
大國□通□□□□_缺下空

今上成行□□□□□□□□□□□□□□□□知政事八
都魯切念宿非□□□□□□□□誕中華賴□□□□□□休藉□□
□□□□□□□□□□□□□□必生於荆岫仰酬□□□□
□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□

□□□□□室思福壽千春

缺 下空

□□□□□□□□□□□□□路都總管府都總□□

都魯

缺

下空

此後一行上缺下空

上

吉日

謹誌

都

泐幾字
不可辨祥

見年衆知事等

宣授住

泐

通辯大師進吉祥

宣授住持堂

泐

德大師淨吉祥

宣授為首住持傳法講主

泐

鹿泉石匠孫和鐫

右碑剝落殊甚立石年月及撰書人姓名皆缺因記

中有□知政事八都魯及記後有梵書二行遂定為

元刻碑有□知政事八都魯切念宿非□□云云又

有地五段計壹伯貳□□畝駟馬壹疋又記後有

上闕

路都總管府都總□□都魯下闕知碑係八都魯捨地

土駟馬於寺中因記功德而作駟字字書不收惟見

明張自烈正字通古止作扇五代史郭崇韜傳謂繼

岌曰當盡去宦官至於扇馬亦不可騎是也又上闕八

都魯知字上當是參字案元史宰相年表參知政事

內無八都魯則參知政事上勅者當是某處行中書

省參知政事至正六年贈思佛光國教大師碑所云

趙王之屬山前十路都總管八都魯以是職來眞定

蓋卽其人也又記後寺僧題名四行可辨者有宣授

住持通辯大師進吉祥宣授住持□德大師淨吉祥

案佛光國教大師碑陰國教大師法嗣門資內有新
樂進講主未知卽通辯大師否

常山貞石志卷二十四

金石之學 本朝最盛薈萃成書者不下數十家大半皆限以方域有以一省爲斷者畢秋帆尚書之志中州關中朱笥河學士之志安徽翁覃溪侍郎之志江右粵東謝蘊山中丞之志粵西阮雲臺相國之志山左兩澍是也有以一邑爲斷者葉升叔之志嵩陽武虛谷之志偃師安陽袁蘭村之志河內段襄亭之志武功錢易軒之志嘉定是也其以一郡爲斷者浴禮所見惟嚴子進之志江寧李金澗之志括蒼二種而已正定古常山郡西控太行面臨滹水爲畿南要衝漢唐以來名城劇縣嚴關古驛精藍佛塔屢經更置其間豐碑鉅碣踈然林立炎風伏雨之所剝鏤村農堯豎之所培擊偃仆道旁

沈荊上中者不知凡幾前賢之遺文妙蹟日就晦蝕末
由徵信識者恡焉匏廬先生來典茲郡政通民和以其
暇搜拓得若干種證以史志暨歷朝金石之書雪纂露
鈔成二十四卷題曰常山貞石志中多曩哲所未聞時
賢所希觀綴緝之功旣勤且博矣因念畿輔輿地方數
千里金石文字宜甲於他省今觀朱竹垞日下舊聞僅
載順天一路孫氏訪碑錄所列亦止三百五十餘種其
所著京畿金石攷雜取鄴注歐錄寶刻叢編天下金石
志諸舊文摭拾成帙初未嘗纔幽鑿險親模其文於荒
煙蔓草間豈啻古之癖前後賢不相及歟抑旁搜遠紹
有志而未逮歟然則先生斯志雖一郡之書要與畢朱

翁阮諸公所撰次爲不朽盛業則均也浴禮於金石之
學未窺涯涘顧念受先生知謬與校錄竊願附名卷尾
以傳至其書疏通證明繁而有節簡而不齟有遠出畢
翁諸家之上者觀者當自識之茲不復贅焉後學任耶
邊浴禮跋尾